

大石也 tiòh 石仔 kēng

高英男 | 教會執事

古早，有一對兄弟仔，大兄自細漢就對美術真有興趣，家己 mā 一直認為真有才情，一心一意 sià 想大漢了後，會當成做一個真出色 ê 美術家。小弟 --leh? 是一個安分守己 ê 人，伊知影家己有幾兩重，所以真認份，選擇去 pháng (麵包) 店 kap 人學師 (sai) 仔，以後好 thang 做一個做 pháng ê 師傅。果然，大兄如伊所願，進入美術學校，專攻畫圖。小弟 tiām-tiām 仔做，實實仔過，nóa 麵粉、烘 pháng (麵包)，日子一工過一工。伊有一句箴言，就是：「輸輸仔贏！」

大學畢業了後，chit 個大兄信心滿滿，老神在在，自認家己翅股硬 --a，有 hit ê 實力 kap 才調來發揮伊 ê 專長，所以就學人開始開畫展賣畫。小弟知影兄哥 ê 實力 kap 愛膨風 ê 個性，所以便若兄哥開畫展，伊就偷偷仔用伊 ê sai-khia 錢贊助，叫人去 kā 畫買--落--來。Chit 個大兄看著家己 ê 畫有銷，chiok 爽，心內 iáu 久 liáh 準伊 ê 畫真搶市，尾仔是 jú 翹 jú kōan，人 ná 來 ná sàng-sè，漸漸也開始看 bē 起 chit 個做 pháng ê 小弟。

忍耐 chiok 久--a！有一工，大兄總算起大膽開嘴 kā 小弟表示 beh 分家，然後去都市發展。伊半 khau 洗對小弟表示，無想 beh kap 小弟全款，留 tī chit 個死窟浪費性命，無前途。伊 beh 開眼界，好好仔去享受外口 chit 個真吸引--人 ê 花花世界。

一目 nih，離開故鄉已經幾若年。有一擺，chit 個大兄轉來厝，想 beh thèh 一寡 khah 早無 chah 走 ê 物件，三 péng 四 chhōe，就是 chhōe 無

伊所 beh tih ê 物件。沿路想、沿路 chhōe，真 chhàu-tú-khám (湊巧) chhōe 來到地下室 ê 門口，伊 phah 開門一看，規個人 soah lóng gāng--去！「Ah！我早前開畫展所賣--出--去 ê 畫，ná 會 lóng tī chia?」Chiah 知，原來 hō 伊看 kài 無 ê 小弟，暗中一直 tiām-tiām 仔 teh kā 奧援、幫助。人講：「田螺疼尾溜」~後悔！Chit 個大兄目屎 lìn--落--來，伊搥心肝，懊惱早前對小弟所做 ê 一切。

約翰福音第七章記載：「猶太人 tī 節期中 chhē (註) 耶穌講，伊 tī tá-lòh? ……當節期 è 中站耶穌上殿教示。猶太人就奇怪，講，Chit ê 人 bē 有入學，tùi tá-lòh bat 冊？」耶穌 tī 搭寮節節期中站上聖殿去教示人，hō hiah-ê 猶太人 è 頭人，對伊 ê 能力 kap 學問產生 giâu 疑，看伊 chiok 無。耶穌 kā in 講：「我 ê 教示 m̄ 是屬 tī 家己，是屬 tī 差我 --ê。Tùi 家己來講 --ê，是求家己 ê 榮光；獨獨求差伊--者 (è) ê 榮光，hit ê 人就是真，亦伊 ê 內面無不義。」

朋友，日常 ê 生活中，你是 m̄ 是也會有驕傲、自專 ê 時陣--leh? 做人 tiòh-ài khah 靠 siók，目頭 m̄-thang siu" 過頭 kōan，看人無起。「大石也 tiòh 石仔 kēng！」好款待人，就是 teh 恩待家己！現此時 hō 你看無上目 ê 人，kiám-chhái 有一工 hōan-sè 會成做是你一生中上重要 ê hit è 貴人來幫助--你 mā 無一定 oh！

附註

「chhē」：此字在約翰福音出現34次，其中有17次帶有「藐視」之意。